

KONSEP TAUBAT MENURUT PERSPEKTIF ISLAM

THE CONCEPT OF REPENTANCE FROM ISLAMIC PERSPECTIVE

H. Y. Ahmad Mujahideen¹
A. G. Hamidi²

¹ Jabatan Usuluddin, Kolej Islam Antarabangsa Sultan Ismail Petra (KIAS), Nilam Puri, Kota Bharu, Kelantan, Malaysia, (Emel: amy_mujahid@yahoo.co.in)

² Jabatan Syariah, Kolej Islam Antarabangsa Sultan Ismail Petra (KIAS), Nilam Puri, Kota Bharu, Kelantan, Malaysia, (Emel: al_humaidi011@yahoo.com)

Article history

Received date : 19-5-2020
Revised date : 20-5-2020
Accepted date : 27-6-2020
Published date : 28-6-2020

To cite this document:

Ahmad Mujahideen & Hamidi (2020). Konsep Taubat Menurut Perspektif Islam. *Journal of Islamic, Social, Economics and Development (JISED)*, 5(29), 100 - 108.

Abstrak: Setiap manusia tidak terlepas daripada melakukan kesalahan dan dosa. Namun, orang yang melakukan kesalahan yang paling baik adalah orang yang sering bertaubat. Ini kerana taubat boleh menjadi penyuci kepada dosa seseorang. Akan tetapi, taubat mempunyai hukum dan syarat-syaratnya yang tertentu. Oleh itu, kajian ini membincangkan konsep taubat menurut perspektif Islam yang berbentuk kajian kualitatif. Kajian ini merupakan kajian kepustakaan yang melibatkan metode pengumpulan data dan penganalisaan data. Hasil dapatan kajian ini menjelaskan bahawa taubat ialah permohonan ampun dan penyesalan di atas dosa yang telah dilakukan secara ikhlas kerana Allah S.W.T. dan berazam untuk tidak mengulanginya serta meminta halal terhadap hak manusia dengan mengembalikannya kembali. Selain itu, berdasarkan kepada dalil-dalil, hukum taubat adalah wajib dan seharusnya dilakukannya dengan segera. Diharapkan agar kajian ini dapat memberikan penjelasan kepada masyarakat terhadap konsep taubat bagi penambahan kefahaman agar taubat dilakukan dengan betul dan diterima oleh Allah S.W.T.

Kata kunci: Taubat, Islam

Abstract: Every human being is free from mistakes and sins. However, the people who make the best mistakes are the ones who often repent. This is because repentance can be a cleansing to one's sin. However, repentance has certain laws and conditions. Therefore, this study discusses the concept of repentance based on Islamic perspective which is a qualitative study. This study is a library study that involves data collection and data analysis. The findings of this study make it clear that repentance is a request for forgiveness and remorse for sin that has been committed sincerely for Allah S.W.T. and is determined not to repeat it and ask for the lawful treatment of human rights by returning it. Also, based on the arguments, the law of repentance is compulsory and should be done immediately. It is hoped that this study will provide the public with an understanding of the concept of repentance for enhancing the understanding that repentance is done properly and accepted by Allah S.W.T.

Keywords: Repentance, Islam

Pengenalan

Setiap tindakan yang melanggar perintah Allah S.W.T. akan dituliskan dosa. Bagi menghapuskan dosa, maka agama Islam mensyariatkan taubat. Menurut Sri Rahayu Haji Dollah & Khadijah Mohd Hambali@Khambali (2016), taubat menjadi kaedah utama dalam proses penyucian jiwa dalam ajaran Islam bagi mewujudkan hubungan antara manusia dengan Tuhannya. Menurut Osman, Ahmad Sabri, Mohd Farid Mohd Sharif & Raihaniah Zakaria (2015) menyatakan bahawa upaya melestarikan hubungan manusia dengan Tuhan perlu kepada tindakan berasaskan taubat dalam bentuk spiritual yang didokong oleh peranan fizikal manusia. Rohani yang suci bersih dan telus melahirkan keyakinan akan wujudnya kasih sayang Tuhan serta limpahan kurniaNya yang menjanjikan keselamatan dan kesejahteraan di dunia mahu pun di akhirat. Justeru, kajian ini dilakukan untuk menerangkan konsep taubat menurut pandangan Islam agar dapat difahaminya dengan lebih jelas.

Definisi Taubat

Dari sudut bahasa, M. Yusoff M.A., Othman M.S., RT Abdullah, Mohamad N. & Omar S.H.S. (2017) menyebut bahawa perkataan taubat berasal dari perkataan bahasa Arab al-taubah (التوبة) yang berasal dari akar kata ta'-waw-ba' (ت و ب) dan ditukar menjadi kata kerja taba (تَاب) dengan menggantikan huruf waw kepada alif. Menurut Ibn Manzur (2015) menjelaskan bahawa perkataan taubat dari sudut bahasa ialah berasal dari bahasa Arab "taba-yatubu-tauban-taubatan-mataban) yang membawa erti kembali dari maksiat kepada taat. Ibn Faris (2018) menyebut bahawa perkataan taubat mempunyai pelbagai makna, namun kesemuanya membawa maksud kembali. Menurut Ibn Manzur (2015) dan al-Fayruz Abadi (2019) sepakat menjelaskan bahawa taubat bererti kembali kepada Allah S.W.T. daripada dosa, kembali kepada Allah S.W.T. sahaja, atau kembali mentaati selepas berbuat dosa, atau bermaksud kembali daripada dosa. Noresah Baharom (2010) menerangkan bahawa taubat bermaksud kembali kepada Tuhan dengan meninggalkan perkara yang dilarang dan membuat apa-apa yang disuruh, atau berpindah agama kepada agama yang dianggap benar. Dalam bahasa Inggeris, taubat sama maksud dengan repentance atau regret yang membawa maksud yang sama (Joyce, 2017).

Jika dilihat dari sudut makna perkataan taubat, Ibn Manzur (2015) menyatakan bahawa taubat bermaksud merujuk kepada tindakan Allah S.W.T. memberi ampun, menerima, mengembalikan atau kembali ke arah manusia dalam bentuk rahmat dan kasih. Menurut al-Fayyumi (2017), al-Asfahani (2015), Ibn Faris (2018), dan al-Zamakhshari (2017) telah memberikan pengertian taubat Allah S.W.T. ke atas hamba bermaksud Allah S.W.T. telah kembali kepada hambaNya dengan keampunan. Putaran ini adalah peralihan daripada kemurkaan Allah S.W.T. kepada rahmatNya, penolakan kepada penerimaan, atau daripada hukuman kepada keampunan (Sri Rahayu Haji Dollah & Khadijah Mohd Hambali@Khambali, 2016).

Manakala dari sudut istilah, Abdul Malik Abdulkarim Amrullah (2017) dalam tafsir al-Azhar telah menukulkan pendapat cendekiawan silam tentang maksud taubat iaitu menurut al-Kalbiy, taubat ialah menyesal dalam hati, meminta ampunan dengan lidah, berhenti disaat itu juga dari dosa tersebut dan meneguhkan azam tidak hendak mendekat ke sana lagi; menurut Sa'id ibn al-Musayyab, taubat ialah menasihati diri kerana telah bersalah dan patuh menuruti nasihat itu dan menurut Sa'id ibn Jubair, taubat yang diterima Tuhan hendaknya memenuhi tiga syarat

iaitu takut taubatnya tidak akan diterima, mengharap agar diterima dan memulai saat itu memenuhi hidup dengan taat.

Menurut al-Ghazali (2015) menyebut bahawa taubat itu kembali mengikuti jalan yang benar dari jalan sesat yang telah ditempuhinya. Abu Jaib (2015) menyebut bahawa taubat bermaksud penyesalan dan pencabutan dosa maksiat yang dilakukan, berserta azam untuk tidak mengulanginya semula sekalipun berkemampuan melakukannya dan bukan disebabkan rasa takut mendapat mudarat kepada badan dan harta akibat perbuatan maksiat. Menurut al-Qushayri (t.th), taubat ialah meninggalkan dosa dalam segala bentuknya, menyesali dosa yang pernah dilakukan, dan bertekad untuk tidak melakukan dosa lagi.

Dalam Kamus Dewan, taubat ialah penyesalan akan dosa (perbuatan jahat dan lain-lain) dan berazam untuk tidak akan berbuat dosa (jahat) lagi atau kembali kepada Tuhan (dengan meninggalkan perbuatan dan lain-lain yang dilarang dan membuat apa-apa yang disuruh) (Noresah Baharom, 2010). Manakala menurut Anwar Fuad Abi Khazam (2015) menyatakan bahawa taubat ialah kembali kepada ketaatan dari semua bentuk kemaksiatan mahupun kembali dari nafsu kepada yang hak lagi benar.

Terdapat banyak definisi taubat yang telah dinyatakan dengan pelbagai pendefinisian. Namun begitu, Amal Soleh Nasir (2016) telah membuat satu kesimpulan tentang hakikat taubat berdasarkan beberapa definisi ulama iaitu pengetahuan seorang hamba terhadap keburukan dan bahaya dosa, lantas meninggalkan perbuatan dosa itu ikhlas kerana Allah S.W.T., menyesal terhadap dosa silam yang dilakukan secara sengaja atau secara kejahilan, berazam untuk tidak mengulanginya pada masa akan datang, melaksanakan segala perbuatan taat dan baik, meminta halal terhadap hak manusia dengan mengembalikan barang miliknya dan meminta maaf serta pelepasan daripada mereka.

Definisi ini boleh dianggap sebagai definisi yang menyeluruh dan meliputi kesalahan yang menyentuh hak Allah S.W.T. dan hak manusia. Ini kerana di samping meninggalkan dosa, amalan soleh hendaklah digandakan dan jika dosa melibatkan hak manusia, mestilah berurusan dengan manusia bahkan tidak memadai dengan keampunan daripada Allah S.W.T. sahaja malah kemaafan daripada manusia diperlukan.

Dalil Pensyariatan Taubat

Terdapat banyak ayat al-Quran dan hadis Nabi S.A.W. yang menjadi dalil tentang pensyariatan taubat, antaranya firman Allah S.W.T. dalam Surah al-Nur ayat 31:

وَتُوبُوا إِلَى اللَّهِ جَمِيعًا أَيُّهَا الْمُؤْمِنُونَ لَعَلَّكُمْ تُفْلِحُونَ ﴿٣١﴾

Maksudnya: “Dan bertaubatlah kamu sekalian kepada Allah wahai orang-orang yang beriman supaya kamu beruntung”.

Firman Allah S.W.T. dalam Surah al-Tahrim ayat 8:

يَا أَيُّهَا الَّذِينَ ءَامَنُوا تَوْبُوا إِلَى اللَّهِ تَوْبَةً نَّصُوحًا

Maksudnya: “Wahai orang-orang yang beriman, bertaubatlah kamu kepada Allah dengan sebenar-benar taubat”.

Sabda Nabi S.A.W. dalam sebuah hadis sahih:

يَا أَيُّهَا النَّاسُ تَوْبُوا إِلَى اللَّهِ فَإِنِّي أَتُوبُ فِي الْيَوْمِ إِلَيْهِ مِائَةَ مَرَّةٍ

Maksudnya: “Wahai sekalian manusia, bertaubatlah kamu kepada Allah kerana sesungguhnya aku bertaubat dalam sehari sebanyak seratus kali” (Muslim, 2015).

Sabda Nabi S.A.W. dalam sebuah hadis hasan (al-Suyuti, 2015):

لَوْ أَخْطَأْتُمْ حَتَّى تَبْلُغَ خَطَايَاكُمْ السَّمَاءَ ثُمَّ تُبْتُمْ لَتَابَ عَلَيْكُمْ

Maksudnya: “Jika kamu melakukan dosa sehingga dosa kamu sampai ke langit, kemudian kamu bertaubat, nescaya Allah akan mengampuni kamu” (Ibn Majah, 2015).

Sabda Nabi S.A.W. dalam sebuah hadis sahih (Ibn al-Qattan, 1434H):

كُلُّ ابْنِ آدَمَ خَطَّاءٌ وَخَيْرُ الْخَطَّائِينَ التَّوَّابُونَ

Maksudnya: “Semua anak Adam adalah cenderung melakukan kesalahan, dan paling baik orang yang berbuat salah adalah mereka yang bertaubat” (al-Tirmidhi, 2016).

Selain dari yang telah dinyatakan di atas, terdapat banyak lagi ayat al-Quran dan hadis Nabi S.A.W. yang menjelaskan tentang taubat. Namun begitu, semua ayat al-Quran dan hadis Nabi S.A.W. menerangkan tentang keperluan dan kepentingan untuk segera bertaubat pada setiap masa kerana sifat manusia yang sering lupa dan berbuat dosa.

Hukum Taubat

Berdasarkan kepada ayat-ayat al-Quran dan hadis-hadis Nabi S.A.W., dapatlah disimpulkan bahawa hukum bertaubat adalah wajib. Sebagai contoh jika diperhatikan pada ayat al-Quran dalam Surah al-Tahrim ayat 8, Allah S.W.T. telah memerintahkan orang-orang yang beriman supaya melakukan taubat nasuha. Perintah Allah S.W.T. dalam ayat al-Quran ini menunjukkan wajibnya perbuatan itu selama mana tidak ada petunjuk lain yang menunjukkan pengertian selainnya (al-Qaradhawi, 1418H).

Al-Nawawi (2016) menyatakan bahawa taubat dari semua dosa adalah wajib. Ianya wajib dilakukan dengan segera sama ada dosa besar ataupun dosa kecil. Taubat termasuk dari tugas yang mesti dilakukan dalam Islam dan merupakan prinsip Islam yang penting. Kewajipannya telah ditentukan oleh syara' (al-Quran dan al-Sunnah).

Selain dari nas al-Quran dan al-Sunnah, ijma' ulama menjadi dalil kewajipan bertaubat bagi seorang mukmin. Al-Qurtubi (2016) menjelaskan bahawa umat Islam sepakat mengatakan bahawa taubat adalah fardu ke atas setiap orang mukmin. Ibnu Taymiyyah (1425H) ada menerangkan bahawa setiap hamba wajib bertaubat. Kewajipan ini dikenakan ke atas umat yang dahulu dan umat yang akan datang.

Dari segi logik akal pula, bertaubat itu menjadi wajib kerana realiti kejadian manusia yang tidak dapat lari dari melakukan kesalahan dan paling baik orang yang berbuat salah adalah mereka yang bertaubat (Amal Soleh Nasir, 2016).

Kewajipan Taubat Dengan Segera

Jika taubat adalah wajib bagi setiap orang yang beriman, melaksanakannya dengan segera merupakan kewajipan yang lain pula. Taubat tidak boleh ditangguhkan kerana itu sangat berbahaya bagi hati orang yang beragama. Jika taubat itu tidak dilakukan dengan segera, dibimbangi pengaruh dosa satu persatu akan bertompok di hati sehingga menjadi hitam sebagaimana yang telah disebut dalam sebuah hadis hasan (al-Albani, 1424H):

إِنَّ الْعَبْدَ إِذَا أَخْطَأَ خَطِيئَةً نُكِّتَتْ فِي قَلْبِهِ نُكْتَةٌ سَوْدَاءٌ فَإِذَا هُوَ نَزَعَ وَاسْتَغْفَرَ
وَتَابَ سُقِلَ قَلْبُهُ وَإِنْ عَادَ زِيدَ فِيهَا حَتَّى تَعْلُوَ قَلْبُهُ

Maksudnya: “Sesungguhnya seorang hamba apabila melakukan satu dosa akan tertompok di hatinya satu titik hitam, maka apabila dia meninggalkan perbuatan dosa itu dan memohon ampun, maka hatinya kembali bersih dan sekiranya dia kembali mengulangi perbuatan dosanya itu, maka titik hitam itu akan bertambah sehingga menutupi seluruh hatinya (al-Tirmidhi, 2016).

Menurut Ibn al-Qayyim (2015) menjelaskan bahawa bersegera melakukan taubat dari dosa merupakan kewajipan yang mesti disegerakan dan tidak boleh ditangguhkan. Jika seseorang itu menangguhkan taubatnya, dia sebenarnya menambahkan dosa kerana penangguhan itu. Perkara yang paling bahaya bagi orang yang melakukan maksiat adalah menunda-nundakan taubatnya dengan selalu berkata, nanti saya akan kembali menjadi orang yang benar, saya akan bertaubat, saya akan berhenti dari melakukan dosa tetapi dia tidak melakukannya. Justeru, dikatakan ungkapan “nanti saya akan” merupakan salah satu tentera Iblis. Dikatakan juga majoriti penghuni neraka adalah orang-orang yang selalu berkata “nanti saya akan”(al-Qaradhawi, 1418H).

Syarat Penerimaan Taubat

Menurut al-Qushayri (t.th), taubat secara umumnya ialah meninggalkan dosa dalam segala bentuknya, menyesali dosa yang pernah dilakukan dan bertekad untuk tidak melakukan dosa lagi. Al-Nawawi (2017) menerangkan bahawa taubat itu hendaknya dilakukan dengan mengerjakan syarat-syaratnya yang terdiri dari berhenti dari melakukan maksiat, menyesal atas dosa-dosa yang telah dikerjakan, berjanji dengan bersungguh-sungguh untuk tidak mengulangi berbuat dosa dan dalam hal dosa kepada orang lain, hendaklah ditambah dengan menyelesaikan persoalan dengan orang lain yang bersangkutan.

Dalam hal ini, Muhammad Mutawali al-Sya'rawi (t.th) telah merumuskan syarat penerimaan taubat kepada empat syarat penting iaitu:

i. Menyesal terhadap maksiat yang lalu

Terdapat sebuah hadis sahih (Ahmad, 2015) yang berkaitan dengan syarat ini iaitu hadis tentang "Penyesalan adalah taubat" (الندم توبة). Penyesalan disebut sebagai taubat kerana ia adalah bahagian yang paling penting dari taubat sebagaimana dalam sebuah hadis (al-Nasaie, 2017) yang dihukumkan sahih (al-Albani, 1422H) "Haji adalah Arafah" (الحج عرفة) kerana wukuf di Arafah merupakan rukun haji yang paling penting. Al-Qushayri mengutip pandangan daripada beberapa orang ulama yang mengatakan bahawa penyesalan itu cukup untuk mewujudkan taubat. Dengan wujudnya penyesalan, ia akan menimbulkan dua syarat (rukun) taubat yang lain iaitu keazaman yang kuat dan meninggalkan perbuatan dosa. Adalah mustahil jika seseorang yang telah menyesali atas perbuatan dosa yang telah dilakukan untuk meneruskan dosanya itu atau mempunyai keazaman untuk mengulanginya lagi pada masa hadapan (al-Qaradhawi, 1418H).

ii. Keazaman yang kuat untuk tidak mengulangi perbuatan dosa

Penyesalan berkaitan dengan sesuatu dosa yang telah lepas, sementara keazaman pula berkaitan dengan masa yang akan datang. Keazaman yang dimaksudkan di sini ialah keazaman yang kuat untuk tidak mengulangi perbuatan dosa seperti susu yang tidak mungkin kembali ke puting haiwan setelah diperah. Hal ini semuanya bergantung kepada keinginan dan keazaman orang yang bertaubat itu. Keazaman itu mestilah kuat dan bukan keinginan yang dilandasi oleh keraguan seperti orang yang pada pagi harinya bertaubat, sementara pada petang harinya kembali mengulangi lagi dosa tersebut. Al-Quran telah memuji keazaman yang kuat sebagaimana firman Allah S.W.T. dalam Surah Ali 'Imran ayat 159:

فَإِذَا عَزَمْتَ فَتَوَكَّلْ عَلَى اللَّهِ إِنَّ اللَّهَ يُحِبُّ الْمُتَوَكِّلِينَ ﴿١٥٩﴾

Maksudnya: "Kemudian apabila kamu telah membulatkan tekad, maka bertawakkallah kepada Allah. Sesungguhnya Allah menyukai orang-orang yang bertawakkal kepadaNya".

Orang yang bertaubat adalah orang yang paling memerlukan keazaman yang kuat sehingga dia mampu untuk menguasai nafsu syahwatnya yang menyebabkan dia tidak lagi mengulangi perbuatan dosanya kali kedua dan itulah cara taubat sebenar yang diterima oleh Allah S.W.T. (Amal Soleh Nasir, 2016).

iii. Meninggalkan maksiat yang dilakukan

Sesuatu taubat tidak akan bermakna jika seseorang yang bertaubat itu masih tetap melakukan maksiat yang telah disesalinya dan tidak meninggalkannya. Meninggalkan maksiat itu dianggap sebagai satu amalan kerana dia telah menahan dirinya dari maksiat yang dia inginkan untuk kekal dalam ketaatan kepada Allah S.W.T.. Tidak diragukan lagi bahawa menahan diri itu adalah pekerjaan, gerak tubuh serta jihad di jalan Allah S.W.T.. Firman Allah S.W.T. dalam Surah al-‘Ankabut ayat 69:

وَالَّذِينَ جَاهَدُوا فِينَا لَنَهْدِيَنَّهُمْ سُبُلَنَا وَإِنَّ اللَّهَ لَمَعَ الْمُحْسِنِينَ ﴿٦٩﴾

Maksudnya: “Dan orang-orang yang berjihad untuk (mencari keredhaan) Kami, benar-benar akan Kami tunjukkan kepada mereka jalan-jalan Kami. Dan sesungguhnya Allah benar-benar berserta orang-orang yang berbuat baik”.

iv. Mengembalikan hak manusia

Oleh kerana beratnya pelanggaran hak manusia dan biasanya terjadi diiringi pertengkaran dan permusuhan, maka taubat dari dosa ini dilakukan dengan dua cara iaitu pertamanya dengan mengembalikan hak itu kepada pemiliknya jika orang itu masih hidup atau kepada pewarisnya jika dia telah meninggal dunia. Keduanya adalah dengan meminta maaf atau meminta dihalalkan olehnya setelah dia memberitahunya sekiranya itu adalah hak harta atau penganiayaan ke atas tubuhnya. Sabda Rasulullah S.A.W. dalam sebuah hadis sahih:

مَنْ كَانَتْ عِنْدَهُ مَظْلَمَةٌ لِأَخِيهِ فَلْيَتَحَلَّلْهُ مِنْهَا فَإِنَّهُ لَيْسَ تَمَّ دِينَارٌ وَلَا دِرْهَمٌ مِنْ قَبْلِ أَنْ يُؤْخَذَ لِأَخِيهِ مِنْ حَسَنَاتِهِ فَإِنْ لَمْ يَكُنْ لَهُ حَسَنَاتٌ أُخِذَ مِنْ سَيِّئَاتِ أَخِيهِ فَطُرِحَتْ عَلَيْهِ

Maksudnya: “Sesiapa yang mempunyai (melakukan) kezaliman kepada saudaranya, hendaklah dia membebaskan dirinya daripada kezaliman tersebut (meminta maaf) kerana sesungguhnya (pada hari Kiamat), dinar dan dirham tidak akan memberi manfaat sedikitpun, sebelum amalan kebajikannya diambil untuk saudaranya (bagi menebus kezaliman yang dilakukan). Jika dia tidak mempunyai kebaikan lagi, maka akan diambil kejahatan yang dimiliki saudaranya dan dilemparkan ke atasnya.” (al-Bukhari, 2016).

Kesimpulan

Berasaskan kepada apa yang dibahaskan, Allah S.W.T. telah mensyariatkan taubat kepada para hambaNya sebagai metode bagi penyucian diri daripada dosa dan keterlanjuran melanggar perintahNya. Makna utama bagi taubat ialah kembali kepada Allah S.W.T. yang Maha Pengampun dan Maha Penerima Taubat. Berdasarkan kepada dalil-dalil dan pendapat para ulama, hukum bertaubat adalah wajib dan perlu disegerakan agar setiap hamba sentiasa kembali mentaati Allah S.W.T. Apabila seseorang manusia bertaubat kepada Allah S.W.T.,

maka dosa-dosanya akan diampunkan. Namun begitu, syarat-syarat penerimaan taubat hendaklah dipenuhi dan dilaksanakan.

Rujukan

Al-Qur'an al-Karim.

Abdullah Basmeih (2012). *Tafsir Pimpinan Ar-Rahman Kepada Pengertian al-Quran*. Kuala Lumpur: Darul Fikir.

Abdul Malik Abdulkarim Amrullah (2017). *Tafsir Al-Azhar*. Batu Caves: PTS Publishing House.

Abu Jaib, Sa'di (2015). *Al-Qamus al-Fiqhi*. Beirut: Dar al-Kutub al-'Ilmiyyah.

Ahmad, Muhammad ibn Hanbal (2015). *Musnad Ahmad ibn Hanbal*. Beirut: Dar al-Kutub al-'Ilmiyyah.

Al-Albani, Muhammad Nasir al-Din (1424H). *Sahih Sunan al-Tirmidhi*. Al-Riyadh: Maktabat al-Ma'arif.

Al-Albani, Muhammad Nasir al-Din (1422H). *Sahih Sunan al-Nasaie*. Al-Riyadh: Maktabat al-Ma'arif.

Al-Asfahani, al-Raghib (2015). *Al-Mufradat fi Gharib al-Qur'an*. Beirut: Dar al-Ma'rifah.

Al-Bukhari, Muhammad ibn Isma'il (2016). *Sahih al-Bukhari*. Karachi: Maktabat al-Bushra.

Al-Fayruz Abadi, Muhammad ibn Ya'qub (2019). *Al-Qamus al-Muhit*. Kaherah: Al-Maktabah al-'Asriyyah.

Al-Fayyumi, Ahmad ibn Muhammad (2017). *Al-Misbah al-Munir*. Kaherah: Dar al-Hadith.

Al-Ghazali, Muhammad ibn Muhammad (2015). *Mau'izat al-Mukminin*. Singapura: Pustaka National.

Al-Nasaie, Ahmad ibn Syu'aib (2017). *Sunan al-Nasaie*. Beirut: Muassasat al-Risalah.

Al-Nawawi, Yahya ibn Syaraf (2016). *Riyadh al-Salihin*. Kaherah: Al-Maktabah al-'Asriyyah.

Al-Nawawi, Yahya ibn Syaraf (2017). *Al-Minhaj Syarh Sahih Muslim*. Beirut: Dar al-Kutub al-'Ilmiyyah.

Al-Qaradhawi, Yusuf (1418H). *Al-Taubah ila Allah*. Kaherah: Maktabah Wahbah.

Al-Qurtubi, Muhammad ibn Ahmad (2016). *Al-Jami' li Ahkam al-Qur'an*. Al-Riyadh: Dar 'Alim al-Kutub.

Al-Qushayri, 'Abd al-Qasim ibn 'Abd al-Karim (t.th). *Al-Risalat al-Qushayriyyah fi 'Ilm al-Tasawwuf*. Kaherah: Dar al-Kutub al-Hadith.

Al-Suyuti, 'Abd al-Rahman ibn Abi Bakr (2015). *Al-Jami' al-Saghir fi Ahadith al-Bashir al-Nadhir*. Beirut: Dar al-Kutub al-'Ilmiyyah.

Al-Sya'rawi, Muhammad Mutawali (t.th). *Al-Taubah*. Kaherah: Dar al-Taufiqiyyah.

Al-Tirmidhi, Muhammad ibn 'Isa (2016). *Sunan al-Tirmidhi*. Beirut: Dar Ibn Kathir.

Al-Zamakhshari, Mahmud ibn 'Umar (2017). *Asas al-Balaghah*. Beirut: Dar al-Kutub al-'Ilmiyyah.

Amal Soleh Nasir (2016). *Al-Taubah fi Dhau al-Qur'an al-Karim*. Jeddah: Dar al-Andalus al-Khadhra'.

Anwar Fuad Abi Khazam (2015). *Mu'jam al-Mustalahat al-Sufiyyah*. Beirut: Dar al-Kutub al-'Ilmiyyah.

Ibn al-Qattan, 'Ali ibn Muhammad (1434H). *Bayan al-Wahm wa al-Iham fi Kitab al-Ahkam*. Al-Riyadh: Dar Tayyibah.

Ibn Faris, Ahmad ibn Zakariyya (2018). *Mu'jam Maqayis al-Lughah*. Kaherah: Dar al-Hadith.

Ibn Majah, Muhammad ibn Yazid (2015). *Sunan Ibn Majah*. Al-Riyadh: Dar al-Hadharah.

- Ibn Manzur, Muhammad ibn Mukarram (2015). *Lisan al- 'Arab*. Beirut: Dar Ihya' al-Turath al- 'Arabi.
- Ibn Qayyim, Muhammad ibn Abi Bakr al-Jawziyyah (2015). *Madarij al-Salikin fi Sharh Manazil al-Sairin*. Kaherah: Al-Maktabah al- 'Asriyyah.
- Ibn Taymiyyah, Ahmad ibn ' Abd al-Halim (1425H). *Majmu' al-Fatawa*. Al-Riyadh: al-Awqaf al-Sa' udiyyah.
- Joyce, M. H. (2017). *Kamus Dwibahasa Oxford Fajar*. Selangor: Oxford Fajar Sdn. Bhd..
- M. Yusoff M.A., Othman M.S., RT Abdullah, Mohamad N. & Omar S.H.S., “*Penerapan Nilai Taubat: Asas Perubahan bagi Penagih Dadah*”, Proceeding of International Conference of Empowering Islamic Civilization (2017).
- Muslim, al-Hajjaj al-Qusyairi (2015). *Sahih Muslim*. Kaherah: Maktabat al-Imam Muslim.
- Noresah Baharom (2010). *Kamus Dewan*. Kuala Lumpur: Dewan Bahasa dan Pustaka.
- Osman, Ahmad Sabri, Mohd Farid Mohd Sharif & Raihaniah Zakaria, “*Konsep Keselamatan Dan Kebenaran Menurut Islam Dan Pluralisme Agama: Analisis Menurut Pandangan Ismail Raji al-Faruqi*”, Jurnal Intelek 8:1 (2015).
- Sri Rahayu Haji Dollah & Khadijah Mohd Hambali@Khambali “*Konsep Taubat Menurut Islam dan Kristian*”, Jurnal Afkar Vol. 18 Issue 1 (2016).